

आकाशवाणी जयपुर-अजमेर
प्रादेशिक समाचार

- लोकसभा अध्यक्ष ओम बिरला कह्यो –मजबूत न्याय पालिका ऊं देश रो लोकतंत्र ई मजबूत- जोधपुर मांय आज राजस्थान हाईकोर्ट रा प्लेटिनम जुबली समारोह मांय शिरकत कीनी।
- कौशल अर उद्यमशीलता राज्यमंत्री जयंत चौधरी कह्यो- प्रधानमंत्री नरेन्द्र मोदी री अगुवाई मांय चलाया जा रह्या न्यारा-न्यारा अभियान ऊं नौजवानां मांय नुवो उमाव।
- प्रधानमंत्री नरेन्द्र मोदी काल आकाशवाणी ऊं प्रसारित कर्या जावण खास कार्यक्रम 'मन की बात' मांय विचार बतावेला।

अर

- प्रदेश मांय चौमासा री चोखी बिरखा-राज्य रा ऊगणी हलकां मांय कठे-कठे भारी बारिश री चेतावनी।

000

लोकसभा अध्यक्ष ओम बिरला कह्यो है के देश मांय न्यायपालिका मजबूत है ई कारण भारत रो लोकतंत्र मजबूत है अर इण री विश्वसनीयता री देश अर दुनिया मांय न्यारी ओळखाण है। वे राजस्थान हाईकोर्ट रा प्लेटिनम जुबली समारोह रा तैत आज राख्यी ज्यी कार्यशाला मांय बोल रह्या हा। ई मौके बिरला कह्यो के सगळा सारु एक सरीखी न्याय व्यवस्था व्हेवण री सूरत मांय ई विकसित भारत रो सपनो सांचो व्हे सकेला। वे न्याय प्रणाली मांय तकनीक ने महत्त्व देवण अर सरल अर सस्ता न्याय री पैरवी करता थकां कह्यो के बार अर बैच मांय बातचीत अर चर्चा जरूरी है।

.....

लोकसभा अध्यक्ष कह्यो के राजस्थान हाईकोर्ट री देश री न्याय पालिका मांय खास ठौड़ रही है। वे कह्यो के राजस्थान हाईकोर्ट मांय वकालत करण वाळा केई वकील सुप्रीम कोर्ट अर इन्टरनेशनल कोर्ट मांय ई वकालत रो लोहो मनवायो है। केन्द्रीय कौशल अर उद्यमशीलता राज्यमंत्री जयंत चौधरी कह्यो है के सरकार सागे

गैर-सरकारी हलका अर सामाजिक संगठनां री कौशल विकास मांय खास भूमिका है। वे आज जयपुर मांय राख्यी ज्यी कार्यशाला मांय बोल रह्या हा। चौधरी कह्यो के देश रा नौजवानां ने माळी तौर ऊं खुद रे पाण ऊबा करण सारू सरकार लगातार काम कर रही है।

.....
ई मौके केन्द्रीय मंत्री प्रदर्शनी रो उद्घाटन ई कीनो। कार्यक्रम मांय प्रदेश रा उद्योग अर कौशल विकास राज्य मंत्री के के विश्नोई अर सांसद मंजू शर्मा सागे केई अहलकार अर दूजा लोग मौजूद रह्या।

000

प्रधानमंत्री नरेन्द्र मोदी कह्यो के देश रो हर रेहवासी साल 2047 ताई भारत ने विकसित देश बणावणो तैय कीनो है। वे आज नई दिल्ली मांय नीति आयोग री बैठक मांय बोल रह्या हा। प्रधानमंत्री कह्यो के ऐडो करण मांय राज्य सक्रिय भूमिका निभा सके है, कांकि वे जनता सागे सीधा जुड़योड़ा है। मीटिंग मांय विकसित भारत रा दृष्टिकोण पत्र माथे चर्चा करी ज्यी अर विकसित भारत बणावण रा काम मांय राज्यां री भूमिका रा बारा मांय विचार करी ज्यो।

000

.....
कपड़ा मंत्री गिरिराज सिंह आज जोधपुर पधार्या। वे जोधपुर रा इंडियन इंस्टीट्यूट ऑफ हेंडलूम टेक्नोलॉजी-आईआईएचटी मांय सिखावण लेवण वाळां सागे बातचीत कीनी। इण ऊं पैली खबरनवीसां सागे बातचीत करता थकां केन्द्रीय मंत्री कह्यो के खेती पाछे कपड़ा उद्योग नौकरी-धंधा रा मौका देवण वाळो दूजो मोटो हलको है। गिरिराज सिंह कह्यो के जोधपुर मांय हैण्डीक्राफ्ट, हैण्डलूम अर टैक्सटाइल रा हलका मांय काम-धंधा रा मोकळा मौका है। वे कह्यो के दुनिया मांय भारत रा हथकरघा माथे बण्या कपड़ा ने पहचाण दिरावण सारू सरकार री मदद सागे टैक्नोलॉजी रो ई खास काम है।

.....
000

प्रधानमंत्री नरेंद्र मोदी काल संवारे 11:00 बज्यां आकाशवाणी ऊ प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 112वीं कडी व्हेला। मन की बात कार्यक्रम आकाशवाणी अर दूरदर्शन रा पूरा नेटवर्क, न्यूज ऑन एआईआर वेबसाइट अर मोबाइल एप माथे ई सुण्यो जा सकेला। इण रो प्रसारण आकाशवाणी समाचार, डीडी न्यूज, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई कर्यो जावेला।

0000

विधानसभा मांय आज युवा संसद राख्यी ज्यी। विधानसभा अध्यक्ष वासुदेव देवनानी री सदरत मांय राख्यी ज्या ई कार्यक्रम मांय विधायक, स्पीकर, मुख्यमंत्री, मंत्री अर विपख रा नेता री भूमिका मांय प्रदेश री न्यारी-न्यारी स्कूलां रा विद्यार्थी शिरकत कीनी। राष्ट्र मण्डल संसदीय संघ री राजस्थान शाखा री ओर ऊं राख्यी ज्या युवा संसद कार्यक्रम मांय स्पीकर देवनानी नौजवानां ऊं जातिवाद अर क्षेत्रवाद ऊं ऊंचा उठ र नेशन फर्स्ट री भावना सागे काम करण बाबत कह्यो। वे कार्यक्रम मांय मौजूद नौजवानां ऊं देश रा प्रति कर्तव्य निभाता थकां एक भारत श्रेष्ठ भारत बणावण सारू काम करण बाबत ई कह्यो।

000

जगद्गुरु रामानंदाचार्य संस्कृत विश्वविद्यालय रो छठो दीक्षांत समारोह आज जयपुर मांय राख्यी ज्यो। कार्यक्रम मांय 12 विद्यार्थियां ने सोना रा तमगा अर 27 जणा ने पी. एच.डी. समेत सवा सात हजार विद्यार्थियां ने उपाधियां दे र नवाजी ज्या। जळसा मांय राज्यपाल कलराज मिश्र खुद रे पांण ऊबा भारत री निजर ऊं नुवी शिक्षा नीति ने खास बताता थकां कह्यो के इण मांय देश रो जूनो अर दुनिया रो नुवो ज्ञान भेळो करी ज्यो है। जळसा मांय नामी विचारक अर पद्मविभूषण ऊं नवाजी ज्या स्वामी रामभद्राचार्य ई मौजूद रह्या। ई मौके वयम पुस्तक रो विमोचन ई करी ज्यो।

000

प्रदेश मांय लगातार चौमासा री बिरखा व्हे रही है। चित्तौड़गढ़ मांय आज लगातार तीजा दिन बिरखा व्ही। गुंजाली नदी मांय घणो पाणी आवण ऊं हमेरगंज, -टोलों का लुहारिया गेलो बंद व्हे ग्यो। बारां मांय ई आज आखा दिन रूक-रूक र मेह बरसतो

रहयो। बूंदी मांय दोपहरां पाछे व्ही तेज् बिरखा ऊं नीचला हलकां मांय पाणी भर ग्यो। टोंक मांय व्ही बिरखा ऊं गर्मी अर उमस ऊं आराम मिल्यो। राजधानी जयपुर रा केई हलकां मांय आज ई बिरखा व्ही। सवाईमाधोपुर अर आरे-सारे रा हलकां मांय ई लारला चौबीस घंटां मांय चोखी बिरखा रा समाचार है। मौसम विभाग काल राज्य रा ऊगणी हलकां मांय केई ठोडां घणी ज़ोरदार बिरखा व्हेवण सारू चेतायो है। महकमो दौसा, कोटा, सवाईमाधोपुर, जयपुर, टोंक, करौली, अलवर, बूंदी, भरतपुर, बारां अर नागौर सारू बिरखा रो ऑरेंज अलर्ट जारी कीनो है। जोधपुर, बीकानेर, उदयपुर, हनुमानगढ़ अर शेखावाटी हलका समेत राज्य रा आतूणी हलका सारू येलो अलर्ट जारी करी ज्यो है।